

欽定大清會典事例

欽定大清會典事例卷一百七十八

戶部

屯田 新疆屯田

新疆屯田。○乾隆二十一年奏准。巴里坤至濟爾瑪台。濟木薩。烏魯木齊。羅克倫。瑪納斯。安濟。哈雅。精河等處。俱有地畝。可資耕種。伊犁附近地方。約有萬人耕種地畝。空格斯。珠勒都斯等處。可耕之地亦多。現在伊犁有回人三千餘名。令巴里坤辦事大臣及甘肅撫臣。派出綠旗兵一百名。委員酌帶籽種農具耕牛。於明年正月

內前來。分別按地酌給耕種。俟試看一年。再行辦理。○又

諭回人與額魯特等。素如敵讎。若令回人屯種伊犁。或受額魯特等欺陵。轉恐滋事。不若仍令回人各歸原處。令其輸納貢賦。似較妥協。伊犁等處可種之地既多。酌量遣派內地兵民前往屯種。照安西地方之例辦理。既可支給屯兵糧餉。而於鎮守地方。更屬有益。○二十二年奏准。吐魯番地方直通伊犁。兼與各處回城聲息相通。即於吐魯番派兵屯種。現在額敏和卓已駐紮此處。尚有闢展地方。地勢

寬展可資屯種。即將所帶綠旗兵丁派令屯田。交與副將督率管轄。並令額敏和卓父子嚴密防範管束。協同辦理。○又奏准。雍正年間。巴里坤駐紮大臣時。奎素石人子。以至尖山子一帶地方。俱經開墾。茲復勘得尖山子起至奎素一帶百餘里內。從前地畝舊迹俱存。係取用南山之水。共有正渠九道。自山口以外。多滲入沙磧。必須木槽接引。方可暢流。其三道河以北。自鏡兒泉三墩起。至奎素止。亦有開墾地畝。正渠三道。及支渠形迹。荒蕪日久。渠身湮塞。現在工多

人少。且工料必須撥運。應於甘涼肅三處。先派種地官兵一千名。於來年正月前往。疏濬水泉。開引渠道。需用工匠物料田器牛隻等項。均由內地辦運。至二三月間。土膏萌動。即分布巴里坤駐紮滿兵三千名。綠旗屯田兵一千五百名。於可墾之地。翻犁試種。巴里坤一帶。氣寒霜早。惟宜青稞。令各兵於青稞外。如糜穀之類。少為試種。儻或有收。再行加增。其官兵整裝銀兩。照例給發。○又

諭。烏魯木齊等處。亦須漸次屯種。接濟兵食。其如何相

度水利。測驗土脈。及派兵前往一切口糧牛具籽種等項。豫為料理之處。著黃廷桂詳悉具奏。○又奏准吐魯番現在耕種屯田之綠旗兵八百名。移往哈喇沙爾。伊拉里克等處耕種。一面查明吐魯番現種熟地若干頃。此外有無可墾之土。共需兵若干。酌定數目。派出兵丁。辦給籽種器具。遣往吐魯番接種。○二十三年奏准。闢展魯克察克。吐魯番。除官兵及回人屯種外。因水乏無可開墾。吐魯番西百餘里。通哈喇沙爾。托克遜城。水頗充足。再哈喇沙爾。通庫車。阿克蘇。大路。舊

係額魯特回人墾種。海都河水甚足。烏魯木齊水亦足用。現於哈喇沙爾派兵二千四百名。烏魯木齊原派兵五百名。增派五百名。托克遜與闐展魯克察克相近。量增兵五百名。闐展仍派兵四百名。共需兵四千三百名。除現在兵丁外。已移咨黃廷桂。於奏派八千名內。先派三千名。攜帶牛具口糧。前赴魯克察克。於三月前趕到。計需籽種一千六百石有奇。除動用闐展存儲外。移文巴里坤大臣。速為運送。○又

諭。昨因軍需羊隻道遠多致倒斃。諭永貴等於屯田處

所廣為墾種。以裕軍食。今據永貴定長等奏稱。本年
在烏魯木齊闡展托克遜哈喇沙爾等處。共派屯田
兵三千六百名。墾地二萬九千二百畝。計布種一千
四百餘石。可收穀三萬六百石。較去年吐魯番闡展
之數加增三倍等語。多種地畝。於軍食有益。現派兵
數。尚覺其少。或伊等計抽調留候成熟。僅得此數耶。
抑或難於多得耶。但添派綠旗兵丁。其後隊尚未起
程者。多係閒住。不妨暫令乘時布種。再陸續前往。至
永貴等辦理屯田。當親往察看。董勸兵丁。其勤於力
作。多種地畝。著即量加賞賚。以示鼓勵。○又

諭屯田為軍食所關。凡墾種地畝。收支穀石。俱宜豫行籌畫。可傳諭永貴等。將現在墾種若干。收糧若干。較去年多增幾倍。足敷兵丁若干人幾日之食。來年亦照此加增。覈計具奏。至平定回部後。屯田兵丁。若同征兵撤回。則將來又煩跋涉。自應留住彼處。來年墾種地畝。應添兵丁。或於征兵內酌量存留。伊等口糧。即在現收穀石內支給。但足敷幾月之食。能及收穫之期否。俱著籌酌奏聞。○又奏准。巴里坤至伊犁。分駐官兵屯田。由近及遠。漸以舉行。凡阨塞諸處。一切修建城堡。分別營站。仍聽將軍兆惠辦理。

至屯田需用牲隻。現由太僕寺解羊萬頭。極為充裕。其鑄造農具。秋冬酌量運送。計由巴里坤至烏魯木齊南路一帶。如闡展。托克遜。哈喇沙爾等處。今歲俱已種植。自烏魯木齊以內。察罕烏蘇。穆壘北路一帶。未設臺站。舊係噶爾藏多爾濟部落。地多砂磧。難於開墾。由穆壘至烏魯木齊一帶。則可墾之地最多。近因哈薩克貿易。派員承辦。並遵

旨。揀選副將一員。帶兵二百名。管押貨物。乘便遶委道員。同往彈壓。即於經過之處。將曾否開墾地畝。

及氣候寒暄。土脈肥瘠。水泉多寡。繪圖貼說。再加酌議。○又

諭。永貴等奏稱。前與雅爾哈善會商。無分進勒屯田。兵丁隨到。即令開墾地畝。續因耕牛農器不能全到。先就開展等處。所有畚鍤。令其開溝築隄。又哈喇沙爾之海都河。水勢湍急。必須渠深岸固。方免衝溢等語。看來今年播種之期。似稍遲誤。但將進勒兵丁後隊截留。人力有餘。或可將烏魯木齊等處。俱行墾種。可傳諭永貴等。現在籌議屯田處所。交秋以後。成熟穀石若干。來年伊犁等處屯田。能以次興作否。並將伊

等奏摺錄寄黃廷桂閱看。俾得酌量豫備。○又奏准
昌吉距烏魯木齊六十餘里。羅克倫距昌吉四
十里。舊係噶爾藏多爾濟之一千六百餘戶游
牧地。平水足。有河渠舊址。修理亦易。丈量得昌
吉可墾田八萬餘畝。羅克倫可墾田七萬餘畝。
應於昌吉羅克倫各駐兵一千五百名。更番開
墾種植。以休地力。○又

諭。勞三前奏請查勘烏魯木齊屯田時。朕即謂雖為期
尚早。亦當先事籌備。隨諭黃廷桂。來年移墾烏魯木
齊屯田。派兵七千名。及辦給農工器具。今昌吉等處

既又可駐兵三千。可傳諭黃廷桂照數添派兵丁。合之前派七千。即得萬人。為數雖多。但屯田兵惟取其習於耕作。不必盡皆精壯。黃廷桂宜酌量辦理。如有不便。即停其添派亦可。仍與勞三、永貴等會商定議具奏。○又

諭據永貴奏稱。將軍兆惠所議屯田收成分數。每人墾田二十五畝。所收穀石。可給八九人之食。詢問官兵等。俱稱必係成熟之地。一家有四五人助力。方如前數。若一人墾田。即盡力不過十四五畝。可食三四人等語。此特據綠旗官兵之飾詞。遂以為實。不但與兆

惠所奏不符。即以內地情形而論。四民之中。農居其一。尚能積貯有餘。流通出糶。永貴等豈未聞知。或因初墾之地。收成歉薄。若將來由近及遠。以漸增加。仍執此定數。安足以給軍食。可傳諭永貴等。加意勸課兵丁。務如農民治田。不留餘力。視其所收分數。再行定議具奏。○又奏。本年開展等五處屯田兵三千六百名。今屆收穫之期。看得地有肥磽。穀分豐歉。米麥合算。通計實屯田二萬二千三百三十五畝。每畝收穫一石九斗至一石四斗不等。共收穀三萬七千三百四十餘石。以去年每畝一石

四斗計之。增出五斗至三斗六升不等。共多收
六千七十餘石。所收穀石。次年自闡展至哈喇
沙爾。烏魯木齊。新舊兵丁。又烏魯木齊附近額
林哈畢爾噶羅克倫昌吉至西托摩楚克等處
新兵。共需籽種一千五百二十石。餘穀三萬五
千八百二十六石。碾米一萬七千九百十三石。
共數官兵跟役九千一百九十人。口糧七箇月
有奇。其不足之數。次年所種小麥青稞。六月內
即可收穫。以資接濟。奉

旨。永貴等所奏闡展等處屯田收穫分數。看來止數屯

兵口糧。其伊犁駐防官兵。仍舊籌畫。可傳諭兆惠。遵照節次諭旨辦理。至從前屢諭永貴等確查收成分數。除新舊屯田兵丁外。尚足敷幾千人之食。伊等遲久方奏。微覺難於籌辦。不思內地農民。何以畝有餘糧。蓋由家長善於勸課。且食用樽節。毫無欺隱耳。兵民雖異。其理則同。永貴其悉心經畫。於軍需自有裨益。○二十四年

諭屯田糧石。關繫軍需。定長等所報碾出數目。有較上年加增者。皆承辦之員實心經理所致。著加恩將都司瑪呼等交部議敘。嗣後各處屯田。除收穫較多者。

准其奏請議敘外。如較原報之數虧缺無多。著暫行登記。准以下次贏餘抵補。儻再有虧缺。即照所缺之數分別議處。庶承辦各員。知所勸懲。可傳諭令其遵照辦理。○又奏准。烏魯木齊增墾屯田。擬於凱旋綠旗官兵內截留五千名。以四千分墾地畝。以一千豫備差遣。明年收穫。即可供伊犁糧餉。俟伊犁屯田又可接續。其巴里坤有屯兵八百名。應將西安提督移往駐紮。此時農具籽種。最為緊要。上年冬月。辦過籽種二萬八千石。運到闢展一萬一千餘石。農具一萬三千副。現存哈密農

具六千餘副。今於肅州雇得商駝四百餘隻。將應送烏魯木齊等處農具籽種口糧。按程給值。源源轉運。至耕田牲隻亦屬要需。甘省各提鎮原有孳生兒騾馬匹。即於此內挑選一二千匹。七八月間送往巴里坤牧放。以備調用。○又奏烏魯木齊新舊屯田兵一千名。舊兵除差遣外。實屯田兵六百七十四名。種地一萬五千一百餘畝。收麥黍一萬二千二百四十餘石。新兵二百名。種地一千五百餘畝。收麥黍二千二百四十餘石。舊兵所種較上年加倍。其收穫亦如之。

○又

諭定長等將本年闢展托克遜烏魯木齊哈喇沙爾喀喇和卓等處屯田收穫分數具奏。又稱除烏魯木齊外。其他地畝。較之初種時。漸覺歉薄等語。此等田畝。雖不能如內地人工奠治。可以常年耕種。但地頗寬敞。彼此遞年互調耕作。自有餘力。著楊應琚會同舒赫德定長。悉心講求。酌議具奏。○又奏准烏魯木齊屯地兵丁。墾種在二十畝以上。而收數多者。官弁議敘。如差繁墾地及數。因被災收數中平。或差繁墾地不及數。又被災傷。以致收數減少。與

事故耽延墾地不多。而每畝收數不減者。均予免議。其墾地不及數。收數不大減。及差調以致地畝收數俱少者。將墾收數目註冊。留給下年積算扣抵。○二十五年

諭安泰奏稱奉巴里坤綠旗兵可否調往烏魯木齊。旨。現在烏魯木齊糧石頗屬饒裕。內地所辦農器多在巴里坤。所有兵丁九百名。與其在彼守候。即可調來烏魯木齊屯田等語。烏魯木齊增兵開墾。既有益屯田。而哈薩克貿易往來。昨尚諭派索倫兵數百名駐紮防範。今增調此項兵丁。更足以壯聲威。即照所

奏辦理○又

諭阿桂奏稱伊犁河以南有地名海努克與固勒扎相隔一日程。途水土沃行。請於此處先行屯種。相其形勢。分立邨莊等語。所辦甚是。俱依議行。果能實心奮勉。次第辦理。則屯田一事。當錄伊經始之功也。至邨莊居住回人。需兵防護。非尋常屯田處所可比。必固其堡寨。勤其瞭望。庶藏匿之嗎哈沁及哈薩克等不敢滋事。至所奏起程以前。派回人修理穆索爾嶺道路。及將來安設臺站行文舒赫德酌辦等語。從前準噶爾與回人往來。俱由穆索爾嶺一路。今既屯田伊

犁。自應時加修理。其酌派回人。及安設臺站。俱傳諭舒赫德知之。○又

諭安泰等奏屯田以漸開拓。直通伊犁。自烏魯木齊至羅克倫。擇水土饒裕之地。立四邨莊。每莊屯兵八百餘名。委遊擊一員。都司一員。分派雜職等督課耕種等語。所見甚是。可即勉力善為經理。至設立邨莊。尤宜防範盜賊。不可輕忽。所奏官兵四五千。間有疾病。乞賞給醫士及藥材等語。著傳諭吳達善於甘肅選良醫二名。並各種藥材。送至烏魯木齊備用。○又諭伊柱奏稱屯田兵丁已抵伊犁之海努克。現在安設

邨堡。修理溝渠等語。看來伊犁屯田。俱有舊蹟。將來漸次開拓。更於軍食有裨。著傳諭伊柱。於一切應辦事宜。先時相度。加意奮勉。督策回人盡力耕耘。毋為偷惰。其地畝數目。收穫情形。可遇便陸續奏聞。○又據阿桂奏稱。本年伊犁屯田。以播種計之。上地所獲二十倍。中地所獲十倍。足數千餘人。來年麥熟前之食。將來增墾益多。則需人益衆。並請於闕展廢員內。遣原任副都統圖克善劉揚前來效力等語。今年數百回人甫經耕墾。即收穫豐裕。覽奏殊為欣悅。伊犁地廣。屯田以多為善。其圖克善等。俱照所請發往。若

仍需人承辦。則烏魯木齊效力官員頗多。著一面具奏。一面調遣。亦傳諭烏魯木齊大臣等知之。○又議准。前因進勒回部。闡展等處。俱係衝要之地。故屯田以接續口糧。供備調遣。今軍務告竣。所有屯田兵丁。或發往伊犁。或遣歸營伍。應酌議闡展等處某處係屬要地。仍應存留官兵外。其年久老疾之人。遣歸原營。餘俱陸續發往伊犁屯田。至從前所墾地畝。酌量留給兵丁耕種。餘俱賞給本處回人。所有現收糧石。既敷臺站屯田兵丁數年之食。亦即照各處所需之數儲備。每

年出陳易新。毋使微變。○二十六年

諭據定長等奏烏魯木齊屯田兵丁較常人所食頗多。照例支給。尚覺不敷等語。已諭於常數之外。每人日加米麩五合。至伊犁屯田回人亦與綠旗兵丁同事耕作。自當一體加恩。著傳諭阿桂將伊等應否加給。或一二年後視其效力如何。再行辦理之處酌議具奏。○又

諭阿桂奏稱葉爾羌喀什噶爾阿克蘇烏什等城有舊在伊犁耕種回人二三千名。今聞開設屯田願來效力者甚多。若悉駐回人即可裁減綠旗兵丁。但該伯

克等。或以錢糧缺額為詞。惟停止協助之費。並照派出回人戶口。減其糧額。則衆皆樂從等語。所奏甚是。伊犁再增回人千餘。生齒更覺繁盛。亦於伊等生計有益。且裁減綠旗兵丁。既省內地之力。而回人田作亦較勝綠旗兵。可將阿桂奏摺錄寄舒赫德等閱看。定議具奏。○又奏准瑪納斯庫爾喀喇烏蘇精河等處。在伊犁烏魯木齊之間。地可屯田。應設立邦堡三處。以次經理。來春先派兵五百名往瑪納斯。以一百名起蓋倉廩房舍。四百名屯田。續派兵五百名往庫爾喀喇烏蘇。即以瑪納斯餘糧

辦給。其精河亦照此續辦。再由烏魯木齊至伊犁。道遠地廣。若安設臺站。以馬兵五百名往來巡查。則外藩貿易人等。觀瞻既肅。於牲隻亦有裨益。今烏魯木齊有索倫兵三百名。來春辦理瑪納斯屯田時。即先派索倫兵五十名同往。分卡巡查。○又奏准。瑪納斯。庫爾喀喇烏蘇。精河三處安設邨莊。駐兵屯田。原以省額林哈畢爾噶一路臺站。輓運口糧之力。續因一時難以盡舉。暫停安設臺站。瑪納斯距昌吉。羅克倫不遠。酌派屯田兵二百名。庫爾喀喇烏蘇。精河。距伊

犁烏魯木齊俱遠。每邨派兵三百名。每人各
墾地十五畝。所需籽種農具駝隻。由烏魯木
齊。巴里坤取用。○又奏准。巴里坤有屯田綠
旗兵一千名。雖經墾種。而地寒霜早。僅收青稞
一種。故屯田兵亦照駐防例支領鹽菜銀兩。兼
以粟麥。共需銀五萬二千三百兩有奇。安西兵
丁三千餘名。計日遷移。俱係折給糧價。更不需
支食青稞。所有屯田兵丁。概行撤回。即將安西
兵派出屯田。以節冗食。○又題准。烏魯木齊等
屯。每兵收穫糧十一石以上至十四石。官弁議

敘署把總外委兵丁俱賞給一月鹽菜。○二十

七年

諭楊應琚奏請將闡展屯田收穫之芝麻菜子分借回人種植。俟收穫後扣還籽種。其餘量為交官以抵應輸額賦等語。闡展所種芝麻菜子上年已試有成效。自應借給回人種植以省運油之費。但回地向未有此。若令其分種恐非所素習。著傳諭德爾格酌量辦理。或伊等不願承種。即毋庸拘泥。該督來咨。勉強從事。再烏魯木齊地畝廣遠。現在開墾三屯。或即於該處播種以濟日用亦無不可。並傳諭楊應琚知之。○

又

諭達桑阿奏稱玉古爾庫爾勒回人等。今歲屆升科之期。派員查勘收成分數。據報玉古爾大小麥俱已成熟。共收穫八千一百餘石。庫爾勒所種。因蝗蝻傷損。僅收三百餘石等語。回人所種地畝。俱資灌溉之利。雖不虞旱澇。而蟲鼠為耗。致成偏災。亦所不免。雖不必盡照內地蠲賑之例辦理。而視其被災分數酌量減免。伊等自感出望外。且實與生計有裨。此次庫爾勒回人等升科伊始。既被偏災。其作何蠲免之處。著速議具奏。將來各城回人所種地畝有成災者。著各

該駐紮大臣詳悉查勘收成分數定議辦理俾回衆咸知朕軫念新附之意即其中有捏報災傷希圖免賦者因此履畝確勘亦得杜其徼幸之端著傳諭永貴等知之。○二十九年

諭伊犁田土肥潤如數多人耕作莫若令滿洲官兵分種既得勤於力農而於養贍家口餵養馬匹均屬有益著交明瑞查明地畝俟滿兵到齊住後酌量分給耕種欽此遵

旨議奏附近伊犁二百里以內可種田地甚多俟官兵到齊再行妥議辦理。○三十一年議准嗣後新

疆種地兵丁每名收穫細糧十一石者。停其議
敘。十八石者。照例議敘。二十八石者。加倍議敘。
○三十一年議准。新疆塔爾納沁額地六千畝。
開墾餘地一千三十畝。按秋收分數。確計所收
糧石。儘數報官。種地違犯。應支籽種農具各項。
一併覈實。官為給發。所有地畝。正餘名目。概行
刪除。力薄之地。准其暫行休歇。另開貼近地畝。
輪番樹藝。以息地脈。至屯糧所需籽種農具。隨
時體察。照例撥給。○四十年議准。嗣後伊犁每
兵收穫細糧至十八石。烏魯木齊收至十五石。

者。官員議敘。兵丁賞給一月鹽菜銀兩。伊犁收
穫細糧至二十八石。烏魯木齊收穫至二十五
石者。官員加倍議敘。兵丁賞給兩月鹽菜銀兩。
伊犁屯田收穫十五石以上。烏魯木齊收穫十
二石以上者。均准功過相抵。如不及者。官員議
處。兵丁量加責處。仍留屯督種。次年收穫足數
議敘。准其開復。不准敘賞。其收穫之數。例應加
倍議敘者。照尋常收穫之例議敘。若次年收穫
糧石。仍不及分數。官員分別議處。兵丁責處。至
伊犁屯田兵丁。如收穫不及十三石。烏魯木齊

收穫不及十石者。官員分別降革。兵丁重加責處。伊犁屯田遣犯。每名收穫細糧九石。烏魯木齊遣犯。收穫細糧六石六斗者。遣犯每名日給白麩半斤。該管各官。照該處屯田兵丁收穫細糧十八石十五石之例。減半分別議敘。伊犁屯田遣犯。收穫十二石。烏魯木齊遣犯。收穫十石者。遣犯每名日給白麩一斤。該管各官。照該處屯田兵丁收穫細糧十八石十五石之例。分別議敘。如伊犁遣犯。收穫六石以上。烏魯木齊遣犯。收穫四石以上者。准其功過相抵。如不及數。

遣犯重責。該管官降一級留任。兼管官罰俸一年。其次年收穫成數。分別多寡黜陟之處。悉照屯田兵丁之例辦理。又塔爾巴哈台。烏什。古城。吉布庫察。把什湖。牛毛湖。各屯種地兵丁賞罰。官員功過。均照伊犁議定分數一例辦理。其哈喇沙爾。巴里坤。照烏魯木齊分數分別勸懲。塔爾納沁一屯。地勢饒薄。每兵收細糧十四石以上。照伊犁收至十八石之例敘賞。收糧二十四石者。照伊犁收至二十八石之例加倍敘賞。如收至十二石者。功過相抵。不及十二石者。照伊

犁不及十五石之例。官員議處。兵丁量責。收穫不及十石者。悉照伊犁議定之例。官員降革。兵丁重責。該處兵丁。向無鹽菜。應賞鹽菜一月者。即給一月口糧。再巴里坤哈密二處。雖派有遣犯耕種地畝。其收成分數。皆與該處兵丁一例交糧。所有勸懲之處。俱照現定該處兵丁分數一例辦理。○四十三年奏准。伊犁屯田兵丁三千名。俱係陝甘兩省各綠營兵丁內戍守。五年一次更換。給予收使銀兩。每月復給鹽菜銀。甚屬煩費。哈密巴爾庫勒烏魯木齊至瑪納斯各

處屯田綠營兵丁。已俱改為攜眷駐防。甚為妥便。今伊犁屯田綠營兵丁。亦應仿照哈密等處攜眷兵丁之例辦理。以期一勞永逸。其該管總兵各員。亦照伊犁現有官員數目出派。伊等既得攜眷永居。不但有裨屯田實效。將來子弟繁多。添設土戶。亦復有益邊疆。而各項費用。可歸節省。應即移咨陝甘總督。酌量分別移紮。再庫爾喀喇烏蘇屯田綠營兵丁。現在亦係五年一次更換。俟伊犁駐防兵丁辦竣後。再行酌照新定章程一併辦理。○四十五年奏准伊犁頭起

綠營攜眷兵一千五百戶內。伊等有情願分戶認地墾種者九十一戶。擬於所居之綏定城東北。並察漢烏蘇東南地方。查勘水泉充足之地。每戶撥地三十畝。令其墾種。照例六年升科。並將分戶人丁編入民籍。其每戶應賞種地農具一分。庫中現存者即為撥給。無者飭令伊犁同知。照依官價採辦分給。所需籽種。一併賞給。至每戶應借房價銀二兩。耕田牛一隻。作價銀八兩。在於官廠內共撥給牛九十一隻。並將麥收以前所需口糧。亦按戶分別大小口數借給。所

借各項俟六年升科時分作三年交庫還項。○
四十七年奏准伊犁屯田兵丁原由三千兵內
派出五百名充當雜差每年令二千五百名耕
田納糧前曾將綠營兵裁汰由內地更換三千
攜眷兵居住仍照前以五百名充當雜差以二
千五百名耕田但伊犁亦屬要疆兵丁自應演
習技藝此數年間俱屬豐收現存糧五十餘萬
石足敷支放三年每年綠營兵民回子等交納
糧米大約十八萬餘石除每年支放外尚餘二
萬餘石應將二千五百名內裁撤一千名操演

以習武備而重邊防。○四十九年議准。烏魯木齊鎮迪道屬各府州縣每年民借籽種口糧。於本年秋收後徵收全完。報部銷案。如有未完。飭催徵不力之地方官如數賠補。並照例分別議處。○五十四年奏准。伊犁綠營兵丁三千名內。派出五百名。應付各工及看守庫倉碾磨等差。每年將二千五百名。分為二十五屯。耕田交糧。前曾撤回一千。裁汰十屯。以一千五百名耕田。一千五百名操演。現統計每年所收。以二十四分為常。可收四萬二千餘石。再撥在綠營屯田。

為民罪犯。應交糧米二千餘石。以至回民應交糧九萬六千石。並各倉斛面羨餘三千餘石。一年共得十四萬三千餘石。伊犁一年支放。共需十六萬六千餘石。所有不敷二萬三千餘石。於倉存五十萬餘石糧米內。照數補放外。止存三十萬餘石。應將現在充當各差之一千五百兵丁內。留八百名習技當差。撤出七百名。添設七屯。自次年為始。令其耕田。照一年二十四分覈算。可得一萬九千餘石。並回民情願增輸之四千石。足敷每年支放糧餉。並將現在所餘倉儲。

按年出陳易新。庶無匱乏。○五十七年

論。向來哈密地方所屬屯田。俱於發往伊犁烏魯木齊
兩處遣犯內截留種地。年滿後再行分別送往原定
配所為民。及當差為奴。但該遣犯等原犯情罪。輕重
不同。若不定以區別。則情罪較重之犯。俱可就近截
留。一經種地年滿。即可傲幸安插為民。未免啟避重
就輕之弊。不足以示懲儆。嗣後該處應留種地道犯。
如原犯情罪本輕者。方准截留。其情罪較重者。概不
得截留。○又奏准。北路科布多。西路伊犁烏魯木齊
吐魯番。巴里坤。烏什。塔爾巴哈台。喀喇沙爾等

處布種地畝。每年收糧分數。或有十分以上。亦有僅三四分者。向例均攤合算。如收在八分以上者。將官兵議敘。若在四分以下者。將官兵議處。嗣後將收糧分數。均照各分內收糧分數。分折獎罰。凡十分以上者。官兵奏請議敘。九分者。該處自行酌量獎勵。如在五分以下者。重責。四分以下者。具奏交部議處。其總管官。仍按所管一切地畝總算。如在八分以上者。交部議敘。四分以下者。議處。○嘉慶四年奏准。伊犁屯田綠營兵丁三千名內。以八百名操練當差。以二千

二百名耕田交糧。數年以來。均屬豐收。除每年放給官員兵丁外。仍餘一萬餘石。並現在各倉所存。共有三十六萬餘石。足敷二年支放。應將現在耕地之二千二百名內。暫撤出四百名。專練技勇。以一千八百名耕田。輪換演習。俾得各歸實效。○又覆准。烏什種地屯兵四百名。裁撤一百五十名歸操。其餘二百五十名。仍留屯糧。所裁屯兵熟地三千畝。撥給回民耕種。免其交糧。俾回民生計益臻寬裕。○七年奏准。錫伯部落官兵人等。專意務農。生計充裕。而伊犁滿洲

兵丁六千名。駐防年久。戶口孳生。家計窮乏。不若令伊等照錫伯之例耕種。其食餉兵丁內。有革去馬甲及前鋒之閒散。或身體羸弱。未能當差者。交領隊大臣等。酌選可種地畝。派出三百六十名閒散佃種。俟次年添人耕種之時。再行酌量數目。更換辦理。○又奏伊犁居住之八旗人等。生齒日繁。曾酌量近水可耕之田。由惠遠惠甯兩滿城。酌派閒散三百六十名。分地試種。秋收通計尚獲十分有餘。本年兩城秋麥業已播種一千餘石。因即酌派委員。於惠遠城東相

度地勢。自伊犁河北岸濬開大渠一道。逶迤數十餘里。儘可引用河水。又於城之西北草湖中。覓得泉水甚旺。設法另開渠道。益資灌溉。新春修築隄岸。廣開支渠。一俟工程完竣。春水暢流。計可澆灌地畝甚廣。即於渠畔揀擇好地。分給惠遠城八旗耕種。其惠甯城八旗。係於該地就近從前綠營裁屯地耕種。原有渠水足資灌溉。兩城種地所需器具等項。酌交各協領。於伊等公設官鋪息銀內動用。三五年內即可全行歸還。惟種地必須牛力。即於官廠內借給惠遠城

八旗。每旗牛八十隻。惠甯城八旗。每旗牛四十隻。俾得藉資耕作。所借牛隻。僅有倒斃。毋庸撥補。均著落各該旗自行買補。以示限制。奉

旨。伊犁駐防滿兵耕種所需器具等項。准其於公設官鋪息銀內動用製備。按限歸款。其應用牛隻。即照所請於官廠內賞借。並責成各該協領督率盡心耕作。以收兵農並習屯守兼資之效。○九年奏准。伊犁綠營兵丁所耕十八屯地畝。又須輪流歇種。覈計倉儲餘糧。共有四十餘萬石。足敷支放。現裁撤三屯。照原定十五屯地畝之數辦理。其歇種年

限。俟五年期滿。照舊添種。所有撤出三屯兵丁。照例操演。修築垣牆。俾歸實用。○又奏。伊犁錢局。設立採銅廠。夫。向派遣犯等於喀什河南屯田。以給各夫口食。總須收穫小麥二千石。方足一年之需。惟遣犯不習耕作。大半有名無實。向來伊犁種地回子六千戶。每戶交糧十六石。通共每年交糧九萬六千石。迨後添墾地畝。又共續增交糧四千石。是六千回戶四十餘年。生齒倍加。遺屯地畝極多。莫若撥給回子耕作。俾應納官糧。贏餘即可養贍家口。又春稽地方有田

二千餘畝。亦准回子耕種。每年所交納小麥二千石。足供銅鉛廠夫口食。所有種地遣犯數十名。歸廠充當苦差。以期便於管束。其內稍有不
法。立予嚴懲。奉

旨。著照所請。將喀什河南遣屯地畝。改撥伊犁種地之六千回戶耕種。仍將本年回子借種額魯特之地一併撥給。其春稽地方有田二千餘畝。亦准回子耕種。每年交納小麥二千石。以供銅鉛廠夫口食。所有撥往之遣犯數十名。即著撤回歸廠當差。○十年具奏。伊犁塔爾奇地方。向設水磨一座。係綠營各屯

攤撥弁兵。輪流應役。該弁兵等由倉領麥。每年磨麪十餘萬斤。以為出差官兵。及各項當差。違犯口食應用。惟新陳相接。不無發變。今官兵等情願各領小麥。自行易麪食用。應裁撤水磨。支放小麥。俾得均霑實惠。此項糧石。本係伊犁回戶。每年交糧十萬石。每石加納三升斛面餘糧。至嘉慶八年。舊存餘糧。儘數支放。所有步甲月支口糧。自九年後。皆於正項糧內支給。年復一年。必致存倉正項虧短。自明年秋收為始。將裁撤綠營磨麪運麪弁兵。分撥各屯。加給籽種耕

種。每年共可增交小麥六百石。所有回戶交糧。每石既有斛面三升。並令屯工每石加交斛面三升。每年又可增交小麥九百餘石。合之每年回戶所交餘糧。計共得四千五百餘石。通計足敷支放惠遠城滿營烏槍步甲及出差官兵各項差役應領口食一年之需。飭糧餉處按年查明報部備案。再回戶交納。不獨每石加交斛面三升。其每斛足數七十斤外。尚有鼠耗。至綠營各屯交糧。從前止交鼠耗。並無斛面。而其每斛斤秤。竟至不如回糧斤秤足數支放。今雖增交

斛面。其所有不敷斤秤。仍令補交。以足兵食而歸實儲。奉

旨。據松筠奏稱。裁撤水磨。將綠營磨麵運麵兵丁。分撥各屯種地納糧。於官兵等較有裨益。所奏似尚可行。惟令綠營屯工於納糧時。一體加交斛面。並補足鼠耗斤秤之處。雖係比照回戶一律辦理。但亦需體察綠營各屯。是否力能加納。並恐開藉端勒索浮收之弊。保甯在伊犁有年。於該處情形。素為熟悉。著悉心詳覈。妥議具奏。欽此。遵

旨。議定。伊犁塔爾奇地方水磨。准予裁撤。該官兵等情

願領麥易麩暨撤出此項兵丁分撥各屯耕種
每年又可增交小麥六百石於倉儲更有裨益
均如所奏辦理至加交斛面餘糧屯兵等力量
未必充裕不若即於原撤屯兵四百名內量為
派撥分屯耕種每年所收糧石自可逐漸加增
不惟官兵口食足敷支給而倉儲亦日臻饒裕
嗣後屯兵交糧斤重照原定每斛七十斤之數
交足外其每石加增斛面三升之處應毋庸議
○又奉

旨伊犁駐防滿洲兵丁生齒日繁松筠相度屯地疏濬

泉源。設法制備器具。借給牛隻耕種。兩年以來。試有成效。茲該將軍猶恐滿洲兵丁公同夥種。久而生懈。請照伊犁錫伯營屯種之例。按名分給地畝。各令自耕。永為世業。係為旗人生計起見。其事本屬可行。惟是新疆重地。設兵駐防。武備最為緊要。此項田畝分給官兵。若令其親身力作。有妨操練。轉致技藝日就生疏。至閒散餘丁內老弱殘病者。豈能令其耕作。勢必仍須壯丁幫助。其強健者。一概驅之南畝。自必不能專心練習武藝。即充數入伍。亦難資得力。殊非慎重邊防之道。此事惟在該將軍妥協經理。既使旗人

有田可耕。永資養贖。而於新疆重鎮設兵防守事宜。無少窒礙。始為盡善。至該官兵等將來生計寬裕。家有儲蓄。即不便照錫伯之例停止口糧。亦當將借支款項量為撙節。○又奏准伊犁旗屯地畝陸續分給官兵。止交閒散餘丁。代為耕種。斷不令妨武備。至惠遠城需地八萬畝。惠甯城需地四萬畝。惟期兩城駐防滿洲官兵。漸次立有世產。如耕作閒散不敷。仍可雇人佃種。現在渠水既足。飭屯鎮總兵等。業將地畝如數辦就。酌量每名放給倉存小麥三石。按限歸款。至於耕種稻田。及備

雇回子一切工本。該協領等以所獲糧石變價辦理。其將來復有贏餘。如何養贍貧乏。設立公倉交糧之處。應視收成多寡。隨年酌辦。俟耕種數年之後。照錫伯立倉儲糧成法辦理。至口糧及借支款項之處。一併再俟察看情形具奏。○二十五年定伊犁滿營屯田種植雜糧。已分田二萬四千畝。續分田二萬餘畝。分授八旗閒散餘丁自行耕種。如有違禁租佃。以及私行典賣情弊。將該旗人及典買之民人。一併治罪。○又定伊犁商民墾種地三萬九千六百一十八畝。

六分。每年額徵銀一千九百八十兩九錢三分。又戶民共種地三千三十畝。額徵銀一百五十一兩五錢。又綠營春兵分戶子弟種地三千四百二十畝。每畝收小麥八升八合九勺。共額徵小麥三百四石。又安插種地編入民籍戶民種地八十四畝。每畝徵糧八升。共額徵糧六石七斗二升。○又定塔爾巴哈台屯兵。共種地一萬四千畝。每年收糧約一萬五千餘石。商民開墾地三千三百九十三畝。三分四釐。每畝每年交租銀一錢。○又定阿克蘇兵丁。屯種地一百五

十畝。每年共收稻穀五百三十餘石。○又定烏
什屯兵。共種地五千畝。收糧五千七十餘石零。
○又定烏魯木齊商戶民人墾種地九千五百
二十五頃八畝五分。每年共徵糧七萬四千九
十四石零。○又定吐魯番屯兵種地一萬四千
七百畝。每年收糧一萬一千六百餘石。○又定
哈密所屬沁城屯所。每年約交糧二千餘石。蔡
把什屯所。每年約交穀麥二千餘石。○道光八
年

論喀什噶爾大河拐一帶空地。前據長齡等奏撥回兵

先行試墾。俟有成效。再行添設屯兵。當經降旨。交那彥成詳勘籌辦。茲據查明該處濱臨大河。水源甚遠。本年春閒派撥回兵等。播種雜糧。均已一律成熟。交納糧石。著俟明年麥熟。再定歲賦科則。惟防兵專事操練。未便仍派屯田。所有該處空地。著即責成伊薩克。廣募無業窮回。及情願試墾之人。陸續認種。逐年加增。照額納糧。以期經久。○十二年奏准。屯田招民。必須得人而理。現已委員在喀拉赫伊地方興辦。倡率商戶。捐借窮戶牛具籽種。俟試種一年後。自道光十四年起。輕定科則。再令按畝納糧。

○又

諭。玉麟等奏。籌辦伊犁旗地佃種收租。作為養贍公用。並嚴禁弊端一摺。伊犁土宇寬廣。惠遠城可種地約計六萬畝。巴燕岱可種地約計一萬三千餘畝。該將軍等所請惠遠城分析地畝。租給回民耕種。歲收地租。抵放兵丁口食。節省銀兩。添補孤寡養贍。壯丁差操。俱著照所議辦理。其巴燕岱地畝。得水較難。著該將軍等督同該領隊西朗阿分投履勘。開挖水道。俟招佃得租。亦照惠遠城貼補養贍差操。以收實用。並著責成各協領隨時稽查。取具各佐領並無典賣侵

肥切結。如有前項情弊。即將該佐領參革治罪。並將該協領嚴參懲辦。○十四年

諭長清等奏。屯田試種有效。請定則升科一摺。巴爾楚

克之毛拉巴什賽克三一帶荒地。前經奏准開墾。茲據長清等奏。查明該處統計開田二萬四千餘畝。共招種地民人三百六十餘名。水暢土肥。夏秋二禾。收成均在九分以上。請自十四年起。按畝升科。所辦甚好者。照所請。所有巴爾楚克新墾地畝。准其仿照北路升科則例。及民屯認墾各成案。酌中輕定科則。同喀什噶爾屯田。均自道光十四年起徵。以供兵糈。並

著造具新招屯民年歲籍貫認種地畝總數清冊咨部備查。○又

諭長清等奏查明巴爾楚克喀什噶爾屯田應升科則酌定章程辦理。據稱巴爾楚克喀什噶爾兩處屯田自開辦以來。設法招徠。認墾之民源源踵至。試種屯民急公嚮義。請自十四年起。納糧升科。惟回疆距口內較遠。茲當創辦之始。止有民人到屯認墾。尚無攜眷而來者。若仿照北路招民開墾成案辦理。每畝糧額輸納八升。科則稍重。未免無所區別。非所以廣招徠而示體恤。所有該處屯田應升科則。著照所請。每

畝徵收小麥三升。俾屯民易於輸將。倍加踴躍。該參贊等督飭委辦各員。認真經理。不得於額外浮收。如查有弊端。即行嚴參懲辦。並出示曉諭。墾屯民廣為招集。如有內地無業貧民。攜眷踵至者。撥給地畝。令其開墾。妥為安撫。其喀什噶爾屯田。即著該城大臣一體照辦。○又

諭。蘇清阿等奏。覆查巴爾楚克等處屯田實在情形。請分別辦理一摺。前因巴爾楚克喀什噶爾兩處屯田。為籌邊要務。疊經降旨。令該大臣等體察情形。務須計及久遠。斟酌妥辦。茲據覆查具奏。巴爾楚克屯田。

原屬荒地。距回莊較遠。與回民毫無妨礙。現於毛拉巴什賽克三引用玉河之水。墾種二萬餘畝。已於本年升科納糧。如於馬尾巴沙虎爾引用渾河之水。則開地益多。招墾愈衆。不惟屯糧可供兵糈。且於邊防有裨。所有該處屯田。著即照舊辦理。毋庸裁撤。○十

五年

諭興德等奏。覆查喀什噶爾屯田情形。請照舊興辦一摺。喀什噶爾屯田地畝。據興德等通盤籌畫。悉心體察。無礙回民生計。於邊防實有裨益。著即照舊辦理。毋庸更張。其原招屯民未回籍者。尚有二百三十餘

名俱准照常耕種。其餘屯地陸續招民認墾。口外地
方率多游民。良莠不一。著興德等督率辦理。各員稽
查約束。務俾各安本業。經久無弊。以收屯田實效。其
原換入官叛產地畝。著准其撥給回民耕種。以昭體
恤。○二十二年

諭。布彥泰奏。籌辦開墾地畝一摺。惠遠城東三顆樹地
方。經該將軍親往履勘。派委各員辦理開墾事宜。計
可得地三萬餘畝。就本地民戶選擇種地輸糧。又阿
勒卜斯地方。亦經勘明。計可得地十七萬餘畝。即責
成阿奇木伯克等。籌計戶口之數。酌量勻撥。○二十

四年

諭布彥泰等奏。墾復荒地。勘估興工一摺。開墾地畝。必先講求水利。來源暢旺。則灌溉有資。現在惠遠城東阿齊烏蘇廢地。據該將軍親往周歷相度。可以墾復十萬餘畝。擬引哈什河之水。以資貫注。將塔什鄂斯坦回莊舊有渠道。展寬加深。即接開新渠。引入阿齊烏蘇東界。並開段酌挖支渠。俾新墾之田。便於澆灌。所議均屬合宜。該將軍等即飭承辦各員。認真妥辦。務在因地制宜。順流利導。以期經久有益。仍著該將軍等。隨時前往查驗督催。毋任稍有怠玩。○光緒九

年奏准。新疆一隅。每年兵餉不下七百餘萬。各省關頻年協濟。竭蹶不遑。嗣後應於南北兩路大興屯田。方於餉項有裨。請飭新疆各路統兵大臣。剋期興辦。該管營官。以本營收穫之多寡。為殿最。各統兵大臣。即以各營收穫之多寡定考成。庶幾餉不虛糜。可資補救。如開辦稍有端倪。即為籌撥款項。續行奏明辦理。○又定興辦屯田章程。一屯田地方。宜豫為籌畫。一各營承種地畝。宜分任責成。一農具等項。宜分別購買修補。一收穫糧石。宜分別扣抵存儲。一分別賞

罰以示勸懲。○十年奏准。乾隆嘉慶年間。新疆開辦屯田。久著成效。現在各統兵大臣。務當不畏其難。督率將弁。令兵勇於駐營之所。揀擇地畝。操完之暇。盡力耕種。以習勤勞。一二年後。收穫豐盈。自可佐餉需之不足。○十六年奏准。伊犁塔勒奇上游屯田八千餘畝。阿齊烏蘇屯五萬四千餘畝。闡里沁水磨渠迤南。阿齊烏蘇迤北。屯地五千餘畝。均交綏定甯遠兩縣。招戶屯墾。又綏定城迤東。牛綠灣。紅山背。新舊惠遠城。紅柳灣。並城東北一帶。及通惠渠地一萬七千

餘畝。稻地通惠渠中渠南渠地九千餘畝。惠甯
城引用闕里沁英霍圖阿里太圖河水灌溉地
三萬五千餘畝。均撥歸旗屯耕種。○又奏准塔
城協標漢隊分隸新疆巡撫管轄。該營屯田事
宜嗣後由該撫辦理。

欽定大清會典事例卷一百七十九

戶部

屯田 北路屯田 西路屯田 東三省屯田

北路屯田○康熙五十四年

命於額德爾齊老圖近推河處所屯田駐兵令將軍費揚古等與喀爾喀汗王等會議○又議准蘇勒圖喀喇烏蘇拜達里克河明愛察罕格爾庫爾奇勒扎卜罕河察罕度爾布拉罕口烏蘭古木等處俱可耕種現在駐兵察罕托輝扎卜罕河特斯河一帶地方應撥土默特兵善種地者一

千。每旗令台吉塔布囊一人率往屯種。遣大臣一人監管。○又奏准烏蘭古木在新設汎界之外。地並山坡山溝。不便耕種。其科布多布延圖郭勒等處耕種。收穫甚多。應豫備籽粒田器。給予公傅爾丹。率土默特人一千。及出兵歸化城。之土默特兵一千。令往耕種。○五十五年議准土默特人一千。往烏蘭古木等處耕種。所需牛種田器。應令都統穆寨等支帑購買發往軍前。贖罪人等有願耕種者。許其耕種。俟收成後。以米數具奏。酌加議敘。○六十年奏准遣官兵在

烏蘭古木之特里河邊耕種。每麥種一斗收麥二石有餘。烏蘭古木地暖土肥。來年可以多墾。○六十一年奏准於烏蘭古木等處平治田畝。開墾溝渠。乘時播種。復派屯種五百官兵於烏蘭古木等處設立營伍。謹汎防守。乘農事畢。引水入地。來春凍開。及時播種。可以增闢田畝。○又奉

旨。據祁里德所奏。在科布多烏蘭古木等處開墾耕種。因土沃水裕。今年所得麥子。一倍收有六倍。爰請明年添種麥石。及詢問齋呈麥麩之阿禮等。據云科布

多烏蘭古木地方廣闊。開墾之處頗多。原係額魯特等耕種好地。今應將歉收之茂岱察罕度爾等處耕種人力。移至科布多烏蘭古木耕種。可以多收。再種地所用犁鋤鐮子鋏鋤等器。每年給發不少。何以一年之間。即俱損壞。鐮鋤鋏俱係鐵器。軍前或難於備辦。犁係木器。何地茂有。若隨伊所請。概行給發。路途遙遠。著人送往。頗費錢糧。再軍前種地人員。稟報所收糧數。一倍有數倍等語。甚不明晰。應照內地或一畝一晌。收得米石若干。如此稟報。方得明晰。其科布多烏蘭古木地方。添種田畝。所給犁鋤鋏等物。

之處著議政大臣詳加議奏。欽此。遵

旨議定。今年種麥多收。來年於科布多烏蘭古木及坤
都倫河諸處可耕之地。以今年所收。用為籽粒
增種。僕不足用。更以鄂勒哲依圖郭勒等處所
收糧。給予增種。至茂岱察罕度爾種地。歉收。即
以所用人力器具。悉移為科布多烏蘭古木耕
種之用。茂岱察罕度爾地。分與發配罪人開墾。
鐮鋤鐵鍬諸器。皆須用鐵。行文山西巡撫。令即
行製造。購駝付侍讀學士阿禮等攜往。秋收後
以時收儲所用之犁。軍前有木可造。令伊等自

製更行文將軍傅爾丹等。將開墾地丈量頃畝。計算籽粒。及秋收糧數詳報。今科布多烏蘭古木。有種地兵及駐紮兵五百。值農隙時。令多伐林木。為修築大城及室廬倉廩之地。○雍正二年

諭。喀爾喀地方駐兵年久。每年由京城運送軍糧。路途遙遠。一時不及。恐兵丁至於乏食。鄂爾坤圖杜一帶。甚為寬闊。若開墾屯田。實為永遠之計。著確議具奏。欽此。遵

旨議定。鄂爾坤一帶。尚有昔人耕種處。及故渠灌田蹤

迹圖拉等處。現有大麥小麥。非不可墾之地。但霜降早晚不一。樹穀宜否。不齊。俟擇屯長中十餘人。於明年三月遣往耕種。屆秋收後具奏。

四年

諭前議於鄂爾坤圖拉地方種地時。曾有人奏稱喀爾喀人等未必情願。朕思喀爾喀地方原被噶爾丹抄掠窮困已極。我

皇考聖祖施恩收養。各按伊等品級封為汗王貝勒貝子。公札薩克。加以重恩。令食俸祿數年間。遂至充裕。安居。原游牧地方。今復安插戍兵。令其種地。亦係特

為喀爾喀護成久遠之計。伊等聞之。定各欣喜。有何
不願之處。朕曾降此諭旨。今土謝圖汗旺扎爾多爾
濟副將軍王丹津多爾濟等。感戴為伊等安插兵丁
之恩。復因先於額爾得尼招地方開種地畝。穀不甚
長。遣人從俄羅斯處。尋得與伊地方相宜之穀實。請
令按時耕種。又情願幫助耕種之人口糧等。因具奏
與朕前旨相符。喀爾喀汗旺扎爾多爾濟王丹津多
爾濟等。實係感激深恩。為國家竭誠效力之人。殊屬
可嘉。著交與理藩院議奏。○十年

諭。從前應行發遣黑龍江等處罪犯。曾改發扎克拜達

里克。彼時所有罪人。跟隨官兵。守護城垣。竭力捍禦。甚屬可憫。朕已加恩。除其罪名。令充綠旗兵丁。入伍效力。續據順承郡王等奏稱。伊等深知感戴朕恩。共思龜勉。可見有罪之人。予以自新之路。仍可望其改惡從善。若發黑龍江三姓諸處。不過終身為人奴僕而已。朕意嗣後。將黑龍江等處人犯。遣往北路軍營附近可耕之地。令其開墾。效功在伊身。可以努力自新。而於屯種亦甚有益。○十三年奏准。鄂爾坤地。雖寬平。然近山高下不一。雖二河環繞。其去水遠者。亦不能徧溉。必須引水試看。方可定議。方今

積雪徧地。河冰盡堅。其水土之肥瘠。與沙石所
在。難以立驗。且穀種收穫所宜。必俟明年試種。
後始知。又募民耕種。不能一時遽集。暫於此間。
撥綠旗兵一百。守營。綠旗步兵二百。家選兵二
百。自湖克新至齊爾瑪臺。擇水土佳處開墾。試
種小麥。豌豆等。又都統銜董相緯。現在察罕托
輝開渠。此處引水灌田。及督率兵丁耕種一切。
即令董相緯辦理。所需耕牛。給喀爾喀副將軍
等銀。令其採買。鋤犁農具等物。察罕度爾有收
存者。即令領取應用。未備者。令戶部辦理。其所

解送各種籽粒。除所在已有者取用外。餘悉行
令歸化城都統由臺遞送。試種一年有效。再據
實以土宜何穀。收穫之數若干。堪種田畝可得
若干。種地人日用所需若干。器械牛種所需若
干。並當於何處築堡以居種地人等。動支何項
一一合計收穫之數。果於

國計有益。可行久遠。俟將來詳細確議具奏。○乾
隆元年

諭。現軍營貯米甚多。足供數年食用。又經通智等運致
數萬石。將來彼處駐戍兵丁。為數無多。不必需用。如

許米石。若收貯日久。恐有黴爛之虞。軍興以來。喀爾喀等頗為出力。近又習慣粒食。若將軍營所貯之米。搭放支給。則米石既不致黴爛。於喀爾喀亦屬有益。再綠旗兵每年種獲新糧。入倉收貯。更可留新出陳。其如何通融辦理之處。著詳細籌議具奏。欽此。遵

旨議定。鄂爾坤等處現存米二十萬餘石。中有青稞麥子大麥小黃米二萬餘石。軍營所有將軍大臣官員兵丁以至僕從等。凡五萬餘人。每月需米七千餘石。至五月青草出時。令所撤兵丁起程。又需辦給行糧。自五月至八月。共需五萬餘石。

開除前項仍存米十四萬餘石。前議撤兵事宜。應留兵一千五百名。喀爾喀兵及守卡倫兵。並酌支米石。近又議每年夏秋時用喀爾喀兵三千名。於鄂爾坤附近屯駐。亦每月賞給羊價米糧。自將軍以下至僕從等。凡一萬六七千人。一年需米約五萬石。計軍營存米十四萬餘石。再益以通智范毓讀運致米石。足供四年食用。至每年收穫新糧入倉存儲。出其陳者。務令不致霉爛。○又奏准鄂爾坤地界寬廣。大可耕種。若撥兵三千人。人各種二十五畝。計可墾田七百

五十頃。以畝收五六斗計算。多可得數萬餘石。少亦二三萬石。現在軍營所存。尚足支數年之用。至數年後所需。令軍營將軍參贊大臣等。按可墾之田。詳細定議。更用專官辦理屯務。○二年奏准。鄂爾坤可耕地。畝實可給三千人耕種。令軍營綠旗兵六百。並罪人計一千有餘。惟現在遵

旨。議運軍糧。不必另議添撥兵丁種地。○二十六年

諭。願魯特回部蕩平。烏里雅蘇台事務。較前甚簡。雖有供應哈薩克來使。及照管續貯糧餉。止須酌留官兵。

不必多為駐紮。以省浮費。現在該處所貯糧石雖多。但不豫籌接濟。必又煩內地之力。烏里雅蘇台雖不便屯田。而科布多向屬可耕之地。若令成衮扎布仍駐紮烏里雅蘇台。另派參贊大臣在科布多屯田。數年後將官兵移駐。將來塔爾巴哈台額爾齊斯等處駐兵。便成犄角之勢。著將烏里雅蘇台現在糧石若干。足敷官兵若干人之食。或裁兵。或折價。又可省出若干。及科布多駐兵屯田之處。詳議具奏。欽此。遵

旨議定。派參贊大臣一員。領綠旗兵一百名。前往科布

多屯田。領喀爾喀兵一百名。以備差遣。本年收

穫後。再將喀爾喀等揀選派往。將來積儲日豐。則烏里雅蘇台官兵。俱可漸次移紮。以展喀爾喀游牧。與塔爾巴哈台額爾齊斯互為掎角。○二十七年議准。上年奏派練旗兵一百名。往科布多屯田。試有成效。再酌量派兵增墾。札薩克圖汗部落公品級札薩克阿喇卜坦屬人。曾於扎卜堪耕種。現在聞散居住。派出二百名。於科布多附近卡倫內耕牧。以裨生計。遇有差務。輪班行走。其月支鹽菜口糧。照屯田練旗兵例。從烏里雅蘇台月支鹽菜銀九錢。米二斗四升九

合。至上年所派一百人。農具多係舊時存儲。及
缺者多。酌為模給。並青稞籽粒。於播種前送往。
○又

諭科布多新開屯田。特派扎拉豐阿前往。伊至彼處。即
應將一切情形。一面報知將軍。一面具奏。迄今數月。
雖將墾田二十頃之處。呈報一次。此時地土肥磽。雨
澤應時與否。及禾苗若何滋長。並未奏及。伊係參贊
大臣副都統。又專辦軍屯事。自應入告。著成衮扎布
等傳諭扎拉豐阿。令將前項情形。明白具奏。○又

諭據扎拉豐阿奏稱。科布多屯田。約計大小麥收穫在

七分以。上。惟所種之粟。因氣寒霜早。秀而不實等語。
杜爾伯特人等。在烏蘭古木耕種。烏梁海人等。在布
拉罕察罕托輝耕種。俱獲豐收。科布多相距不遠。從
前扎哈沁等亦曾開墾。收成尚好。看來此次或播種
稍遲。或霜雪早降。又或土性不宜種粟。著傳諭扎拉
豐阿。詳詢該處舊日居人酌量辦理。其青稞一種。既
係蒙古地方所宜。來年自當廣為播種。毋致失時。○
二十八年議准。科布多屯田。已派喀爾喀兵一
百名。綠旗兵一百名。試有成效。再於烏里雅蘇
台綠旗兵二百名內。派撥一百名。其缺額即以

客爾客兵丁充補。至所需木石鐵匠人數。修補農具。亦在該處酌派。○五十七年

餘科布多。每年種地收糧分數。如復算獎罰。於勤勉出力之人。不能獎勵。而懶惰之徒。更加懶惰。不肯出力。反仗此又可免罰。嗣後科布多所收分數。照各分內種地收糧分數。分析獎罰。其總管官議。欵查議。仍攬算辦理。新疆各處種地收糧分數。俱照此辦理。○又奏准。嗣後科布多種地兵丁收糧分數。不必總算。十分以上者。官兵議。欵九分者。獎勵五分。以下重責。四分以下。議處。總管官總算所管地。欵

八分以上議。欲四分以下議處。○嘉慶二十五年定。料布多共種屯田十分。每年的收糧四千餘石。○道光十年

諭。料布多每歲應放兵糧。向於屯田所獲糧石內支放。該處蒙古兵人數雖多。不諳耕種。全賴綠營兵丁教引播種。該大臣因值弁兵換班之期。恐全行更換有誤。屯田自係實在情形。著照所請。准其將應換弁兵一百六十九員名內的留管屯官弁三員。屯兵六十名。以資熟手。俟下屆換防時。將此次所留弁兵全行更換。該大臣即將新到換防官兵。挑選屯田學習農

務○十四年

諭孝順岱奏科布多屯田緊要請寬留弁兵以資熟手一摺。科布多承種屯田弁兵該大臣因值弁兵換班之期恐全行更換該處情形難以遽易生手有誤屯田自應豫為籌畫著照所請准其將此次應換弁兵一百六十六員名內將上屆留駐兩班弁兵六十三員名全行更換將現駐一班兵一百名內酌留六十三名應換官弁六員內擇其熟悉農務者暫留三員教引新換官弁耕種俟一二年間教引熟悉即將該弁等全行撤回所留兵丁仍不得過兩班以符定制該

大臣即將新到換防官兵挑撥學習。嗣後不得藉詞再留。

西路屯田○康熙五十四年議准哈密地方。可以耕種。令將軍席柱尚書富甯安將西吉木布隆吉爾等處勘明具奏。○五十五年議准勘明哈密所屬布魯爾圖古里克接壤之處。並巴里坤都爾博勒余喀喇烏蘇及西吉木達里圖布隆吉爾附近之上浦下浦等處。俱可耕種。應各令人耕種。給予口糧牛種。再兵丁有願耕種者。亦令耕種。俟收成後。以來數奏請議敘。現在富

富安駐紮肅州。所有肅州附近之西吉木連里圖布隆吉爾等處。即令富富安的量耕種。圖古里克都爾博勒金喀喇烏蘇等處耕種之事。令大臣一人管理。○又

命副都統蘇爾德前往都爾博勒金圖古里克喀喇烏蘇屯田。○又奏准布隆吉爾等處所種田禾俱可豐收。應造倉廩及收存農器房屋。遣官豫為修理。○又議准自嘉峪關至達里圖可耕之地尚多。肅州之北口外金塔寺地方亦可耕種。應徧行踏勘。募民耕種。並令甘肅陝西文武大臣

及地方官捐輸耕種。無論官民有願以己力耕種者。令前往耕種。俟收穫之後。人民漸集。酌立衛所。○又奏准。肅州迤北。可以開墾之處甚多。度量河水所溉田。金塔寺可種三百石。自嘉峪關至西吉木。可種一百三十石。達里圖可種一千一百餘石。方城子等處可種五百餘石。今歲西吉木。達里圖。布隆吉爾三處耕種。已收糧一萬四千餘石。明年諸處應動用正帑。遣官募民耕種。○五十七年議准。侍郎海壽將軍富甯安。新舊所墾都爾博勒金圖古里克及回子札薩

克額敏所種塔勒納沁地所餘青稞悉令備倉
收存。今巡撫噶爾圖綽奇充給軍糧。○五十八
年奏准西吉木等三處定設疆界。現經傳集額
魯特貝子阿喇卜坦等會同西吉木等三處官
示以設立疆界情狀。據貝子阿喇卜坦等云。青
海人等荷

聖主恩甚厚。何惜隙地。地可耕者。聽兵民悉耕之。但留
我等游牧處所足矣。按西吉木等三處。故為西
喇郭勒蒙古部人游牧所在。兵民先已耕種。其
隙地。今蒙古人等游牧如故。達里圖地。有車臣

貝勒屬人與兵民依水道相雜耕種。以西吉木水源並淖泥草墩地不可耕。蒙古人等游牧其間。循水而下。則兵民與貝勒額爾德尼額爾克及貝子阿喇卜坦等屬人。悉在兩岸交錯種地。現於交錯耕種處立界。令不得逾越。○六十年

諭吐魯番現駐官兵其可種之地甚多。總督鄂海按察司永泰著往吐魯番地方種地效力。○雍正元年議准。布隆吉爾駐紮官兵俸餉由內地轉輸。多費不便。前者赤金衛柳溝所等處常募人種地。今於每營撥餘丁二百。每丁官給牛二頭。籽種四

石。口糧三石。次年給半。三年但給籽種之半。嗣後毋給。其田即為耕者恆產。無論米麥青稞。計收三石。以為兵丁月餉。布隆吉爾增設一衛守備。沙州增設一千總。今專管種地事務。布隆吉爾沙州故蒙古地。赤金衛柳溝所。常為蒙古部人游牧所出入。若官兵撤後。仍聽諸蒙古游牧往來。恐致爭競生事。布隆吉爾南山中隙地頗多。若遣大臣一人。率賢能章京往山中分地居之。庶令内外地界明晰。○二年

諭策妄阿喇布坦求吐魯番之地。曾諭從前內附諸

酋長令其遷入內地。今將軍穆克登奏言吐魯番處
共有一萬餘人。若但遷首領數人而不遷其所屬之
人。則伊等生計必致艱難。且伊所屬內願移入內者
不下四五千。人等語。朕思瓜州沙州地方甚寬。亦必
用人耕種。若有願移者。即在此居住。給予一二年養
贖。令其耕種。羅布諾爾地方亦照吐魯番例。有願移
來者。亦隨所部酋長一併移來。不願者仍留本處。○
四年議准甯夏阿拉善山前。勘得自察罕托輝
至石背子一百里。土脈肥潤。耕種易生。其地性
較暖。可引之水。如西河。六洋河。並古渠。大溝。黑

龍口倒流河。新河。黃泥河。董家河。悉前人引水分水故道。今若更修建渠壩及放水牐。其兩岸可以墾田萬頃。又甯夏東北五十里曰察罕托禪。其地南北延袤百餘里。東西廣四五十里。或二三十里。東界黃河。西至西河。其地平行。可以開墾。自鄂爾多斯遷後十餘年。民間有私墾者。若令開渠通水。築隄建牐。以時啟閉。用資灌溉。則曠土可盡為沃壤。今相度地勢。自雙廟墩至六洋河可百餘里。仿漢唐諸渠法。開渠一道。建正牐一。攬水牐。稍牐各一。迎水湃一。又六洋河

口近黃河處亦建正牖。攬水牖稍牖一以資蓄
洩。又自上泗墩至六洋河岸東距黃河五里許。
築堤一道約長百里。可以永禦黃水。墾田六十
餘萬畝。現今總督岳鍾琪赴布隆吉爾相視地
勢。令大理寺卿通智同岳鍾琪至察罕托輝等
處。照圖驗實。覈議具奏。○七年奉

旨。安西屯墾地畝。今年人力既勤。天時復稔。各種糧穀
俱獲豐收。朕心深為慰慶。今查郎阿禁止姦徒興販
射利。辦理甚是。惟是飭令民戶多餘之穀。止許在本
處糶賣。尚未妥協。朕思民戶贏餘之穀。原期糶價以

為日用之資。若本地糶穀者少。則糶賣未免艱難。不可不為計及。著該地方官酌量本地情形。不必相強。若有將贏餘之穀。情願出糶者。著動支官銀。照時價糶買。存貯公所。明年僅有需用之處。聽辦理軍餉之大臣及該督撫行文支撥。安西現有備用銀兩。即可動用採買。再於西安藩庫撥補還項。此朕體恤民戶。俾糶穀得價。用度豐裕之至意。著地方官善於奉行。不可勒令糶賣生事滋擾。○八年

諭。安西沙州等處招民屯墾。原為惠養邊民之計。是以累年以來。備極籌畫經營。期其得所。今從雍正六年

民戶到齊之日。計算至辛亥年。例當輸賦之期。但念小民甫經安插。公私兼顧為難。著寬期二年。於癸丑年升科。俾民力寬裕。俯仰有資。以副朕格外加恩之至意。○又

諭。據甯遠大將軍岳鍾琪奏稱。吐魯番回目額敏和卓屯田種地。恭順效力。甚屬可嘉。朕聞之深為喜悅。額敏和卓賞緞二十四匹。其種地效力之回民。賞銀二千兩。著提督紀成斌。差遣弁兵前往吐魯番。會同額敏和卓秉公賞給。以示朕加恩外番之至意。○九年

諭。西路兵丁口糧。從前議定。每名日支粟米八合三勺。

或炒麪一斤。駐紮之時。本無不足。惟有事行走及對敵之際。晝則追奔攻擊。夜則防範巡查。非駐紮之時。可比。恐舊數稍有不敷。嗣後凡遇此等日期。著每名日支粟米一升。其應支炒麪之。日。每名日支一斤四兩。俾兵丁等口糧寬裕。以昭朕格外加恩之至意。至分派屯種各兵。耕耘播耨。胼胝為勞。其耕種之一月內所支口糧。亦照行走攻戰之兵。米麪一體增給。著即傳諭大將軍岳鍾琪等知之。○十年

諭從前署大將軍查郎阿摺奏。請將吐魯番回衆。在肅州所屬王子莊安插。經廷議令署總督劉於義等確

勘詳查。妥協辦理。朕思回民等輸誠嚮化。自應選給
水土。饒行氣候。和煦之地。俾得樂業安居。肅州之王
子莊。水泉甚少。可墾之地。不敷回民耕種。查瓜州地
土肥饒。水泉滋潤。氣候亦和。與回民原住地方風景
相似。且現在開墾。所種之地。甚為寬闊。足資回民耕
收。由塔勒納沁。遷至瓜州。路不甚遠。可免跋涉之勞。
著署總督劉於義。巡撫許容。將吐魯番回衆。即於瓜
州安插。其築堡造房。給予口糧牛種等項。亦即行估
辦。交原任潼商道王全。臣料理。再令查郎阿。即於軍
營。派一武職大員。先赴瓜州。會同王全。臣悉心妥辦。

回來自塔勒納沁遷移之時。著提督顏清如沿途照看。至瓜州安插事畢。顏清如仍回軍營辦事。○十二

年

諭。據哈密貝子額敏奏稱。所屬回民等。有可種四百石。殺之地。現在軍營屯田界內。願將此作為官地等語。哈密地方。悉皆朕土。無俟伊等獻納。且大兵既撤之後。皆可留與哈密。亦斷無因其獻地。另行安置民人之理。但此地現與官地交錯。若不允其所請。照舊令回民耕種。難免互相爭角。儻收為官地。又係回民生計所資。朕意或另賞伊等地項。及牛具籽種。或每歲

將應得穀石折給銀兩之處。著署大將軍查郎阿就近察議。○乾隆元年議准。哈密回人每年官給籽種五百石。收穫時納米四千石。每石賞銀一兩。現今大兵既撤。哈密止駐兵五千。從前運到米尚存二十萬石有零。自今年為始。免令回人納糧。

○十二年

諭。肅州金塔寺安插吐魯番回子。內有不服水土。至於生計艱窘者一百餘戶。經大臣等議奏。請移於哈密種地居住。此項回衆。向被準夷陵虐。情願移入內地。迄今二十餘載。因水土不宜。積蓄者少。窮迫者多。若

將伊等移於他處。究不能於生計有益。哈密吐魯番。雖部落各異。其教則一。情性相宜。且哈密貝子玉素富。自伊曾祖額貝都拉塔爾罕伯克以來。數世受國家恩澤。竭誠報效。奮勉急公。教養所屬之人。亦屬妥協。現在哈密地方。尚有可種餘地。著將安插金塔寺回衆。交貝子玉素富。併入伊所屬旗分佐領。加意撫恤。令新舊回衆和好如一。撥給餘田。令其耕種。俾永遠不致失所。將此傳諭貝子玉素富知之。○二十一

年

諭黃廷桂奏據哈密貝子玉素富呈稱。從前哈密回人

所種德都摩城國古里克等處地方。仍請賞給耕種
等語。哈密回人生齒日繁。現在準噶爾全部底定。毋
庸於此等地方更設卡倫。著施恩將德都摩城國古
里克地方。仍賞給回人耕種。○又奏准。瓜州回人遷
移魯克察克所遺地畝。共計成熟地二萬四百
五十畝。就近招民承種。借給籽種。照例於收成
後扣除。其糧石仍按官四民六徵收。存儲廳倉。
以備供支。駐防兵丁口糧。○二十二年奏准。前
派兵二百名。赴塔勒納沁開墾屯種。從前約有
地三千餘畝。自乾隆七年停種之後。歷今十五

六載。渠道淤塞。開挖修築。諸費人工。現在上緊開闢。止可種地一千五百畝。布種青稞一百五六十石。餘地俟一二年內漸畝修復。○二十六年奏准。肅州威魯堡安插吐魯番回人。現有二百五十戶。一千五十餘名口。承種熟地一萬五千三百六十餘畝。戶口日增。地畝有限。伊等聞瓜州回人遷回故土。俱各思歸。應准其遷回吐魯番故里。交與該督等酌量附近闢展之吐魯番可以耕牧之地。於今年秋收後遷往。並即於千戶加如拉百戶伊明和卓二人內。揀選一員。

授為伯克。以一員副之。其將來賦稅。即由闡展大臣徵收。並沿途照料。毋令失所。○又奏准。威魯堡回人。於八月內。遷居吐魯番附近。闡展之連木齊木。現有栽屯熟地六千畝。闡展洋赫兩處。俱有熟地一千餘畝。應令千戶如拉。領前往魯克察克之回衆。住連木齊木。百戶伊明和卓。領前往闡展之回衆。仍居舊地。按戶撥給地畝。如尚不敷。仍有近水之地。可以開墾。請將如拉。伊明和卓。俱授為五品伯克。將回衆公舉之瑪瑪古爾班呼岱巴爾氏。授為六品副伯克。

各居分地。管轄回衆。其應輸租稅。俟成熟後酌定升科。○又

諭楊應琚奏。遷居吐魯番回人。現已自肅州起程出關。沿途料理護送等語。前據該督奏。將來回人起程後。所遺熟地。肅州民人俱願認墾升科。經軍機大臣議覆。令於回人起程後。丈明確數。按則升科。該督此時自應遵照前奏。確勘妥辦。其從前瓜州回人所遺熟地。現在作何辦理之處。著一併查明具奏。○二十七年議准。開展屯田兵五百名。裁汰二百四十名。遣回本營。所遺地畝。原派吐魯番伊明和卓所

屬六十戶住闡展。九十三戶住連木齊木。威魯堡。如拉所屬六十戶住連木齊木。二十七戶住洋赫。每戶給田五十畝。今酌將伊明和卓人戶全歸闡展。如拉人戶全歸連木齊木。以便約束。仍有餘田三千畝。令素賚瑞派給莽噶里克沙呼里回人墾種。至裁汰兵丁所餘牲畜。量估價值。給予威魯堡回人使用。其各項農具亦俱作價分給回人。於二年內交納糧石抵銷。

嘉慶十三年

諭塔爾巴哈台屯兵。每年收穫糧石。既不敷支放。而烏

魯木齊一帶官兵為數尚多。且距該處較近。自應量
為調撥。著於烏魯木齊提屬各營撤屯歸操兵內。調
撥二百名。赴塔爾巴哈台屯種。○道光二年奏准。吐
魯番滿營。每年徵收地租內。環城陸續開墾地
一千五百六十八畝。計收租銀六百二十餘兩。
牙木什陸續開墾地七千三百七十六畝。計收
租銀七百三十餘兩。○十七年

諭中福奏稱宜禾縣歲需供支滿洲營官兵並過往官
兵遣犯等項口糧。及戶民春借籽種。共計京石小麥
三萬二千九百八十石零。除舊存新收小麥全數備

抵外尚不敷小麥一萬四千九百三十石零。請按時
價採買。以備支發等語。因思該處地方寬廣。可耕田
畝。諒自不少。果能勤於開墾。則該處一歲所入。自可
供一歲之用。著該都統體察情形。通盤籌畫。該處地
方業經開墾。已報升科者若干頃。歲收糧石若干。此
外未經開墾。尚堪耕種者。確切查勘。奏明飭屬招來
勤加勸課。使地無曠土。田不汙萊。庶歲入之數自增。
兵糈之供自足。較之頻年採買。更足以節經費。而垂
久遠。○二十年

諭烏魯木齊所屬各州縣報墾地畝。經該都統查丈。共

計地三萬五千六百九十餘畝。現已招集戶民認種。所有宜禾縣從前墾成熟地九千三百三十餘畝。即於本年按則升科。其餘新墾各地。准照例試種三年。自道光二十年起。扣至二十二年。再行升科。○二十四年奏准甘肅省荒地較多。現各屬履勘完竣。共查出荒熟地一萬九千四百餘頃。又番貢地以段折畝一千五百餘頃。又甯夏鎮馬廠歸公地一百餘頃。俱分別差等酌量升科奉

諭。甘肅省各項成熟地畝。甫經查獲。未便遽予徵收。著

加恩統於道光二十五年再行一律升科。○光緒十

二年奏准。贖金一帶地方。不獨為晉省緊要邊防。實亦中外喫重關鍵。自宜及時籌議屯政。以裕兵食。擬於大同鎮屬額兵內挑兵千名。作為屯軍。歲需薪費及加練餉乾銀二萬八千餘兩。即由遣撤樹軍餉項八萬四千餘兩內撥用。下餘銀五萬六千餘兩。即作為屯費。毋庸另籌。如將來屯務得手。屯餉等項均有所出。即將節省樹軍全餉。報部備撥。○十三年奏准。烏魯木齊吉布庫地畝。現歸綠營承種。其頭二三等屯。向為綠營屯地。自遣兵變。地畝盡荒。光緒三年始

招集流亡。給資承墾。迄今陸續增添。已安插百數十戶。若以此項地畝撥歸滿營。遷移改撥。徒滋勞費。查古城東灣中渠地屬上中。接引山水澆灌。得地一萬餘畝。如歸各滿營耕種。不敷地畝。可由附近之大板河西岔撥給。大板河約有地三四千畝。西岔約有地四五千畝。該二處曾有戶民墾種。為數尚少。遷移較易。毋庸將頭二三屯地撥歸滿營。如此辦理。兵民似屬兩便。惟東灣中渠等處地畝。修理各渠。非急切所能蒞事。應請展緩三年。再行屯墾。以紓兵力。

東三省屯田○嘉慶十九年

諭富俊等奏。豫議試墾章程。請先於吉林等處閒散旗人內。揀選屯丁一千名。每丁給銀二十五兩。籽種穀二石。於拉林東南夾信溝地方。每名撥給荒地三十晌。墾種二十晌。留荒十晌。試種三年後。自第四年起。交糧貯倉。十餘年後。移駐京旗蘇拉時。將熟地分給京旗人十五晌。荒五晌。所餘熟地五晌。荒五晌。即給原種屯丁。免其交糧。作為恆產。並將屯田出入各數。屯丁用款。及設官管理章程。開單呈覽。此項試墾地畝。需帑無多。將來開墾成熟後。移駐京旗閒散。與本

處旗屯衆丁錯處。易於學耕。夥種不致雇覓流民代
耕。啟田爲民占之弊。所議似屬可行。其單內合計十
年用銀四萬零五百兩。其試墾之第一年。止需銀二
萬八千餘兩。即可興辦。著卽照富俊等所議。挑選屯
丁一千名。由該處備用銀兩內。撥給牛價等項。公倉
內撥給穀種。如法試墾。○二十年

諭富俊等奏詣勘分荒試墾事。竣一摺。拉林西北雙城
子一帶。地土沃衍。經富俊親往查勘。派員屢次。現擬
每旗設立五屯。共屯丁一千名。一切農具耕牛等項。
已分別採買。於本年備齊。明春一律開墾。並據繪圖

進呈。朕詳加披覽。所擬開屯試墾章程。尚為周妥。著照所奏辦理。該將軍等。惟當隨時督察。以期漸有成效。○二十三年

諭富俊等奏大凌河馬廠曠地試墾期竣酌擬章程一摺。大凌河牧廠餘地。試墾期竣。勘丈於原墾續墾十一萬餘畝外。尚浮多地五千八百餘畝。均地近海濱。其中硯薄沙鹼者多。不能按原議照直隸旗租之例升科。著加恩即照養息牧試墾地畝之例。每畝徵租銀四分。作為定額。現存已徵穀一千七百八十餘石。准其減價十分之三出糶。價銀解交盛京戶部存庫。

備用○又

諭富俊奏議吉林站丁地畝章程一摺。吉林站丁私將地畝典賣。若將該丁等自墾地畝。普行勘丈。每名僅留給十晌。餘俱入官徵租。丁力必驟形竭蹶。著仍照松甯原議。循舊辦理。至查出典賣與民地一萬三千五百六十三晌五畝。著照富俊所議。均勻賞給額設站丁八百五十名。每名十五晌九畝零。即作為隨缺工食養贍津貼。其當差窮苦站丁。各按典賣之民種滿十年。照該部屯租地寬減二成。給該丁納租。不准該丁奪地另佃。如民抗不交租。照例撤地交站丁。

諭

自種嗣後如再有越界私墾及私相典賣者丁民俱一體治罪。地價全行入官。以示懲儆。○道光十七年撥派往定於大封堆外展圍荒地一段。遇有退差兵丁每名擬給荒地八畝作為恆產。其大封堆外圍禁閒荒係留備將來接濟京旗及本地屯丁之用。相沿已久。何以歷年經手各員少圍多報私墾之弊顯然。茲據祥康等查明實在情形。並將派查含混具報之員據實參奏。所有原任協領現以佐領告休之圖薩。並歷任夫察之協領佐領駝騎校等。均著交部查取。

職名分別議處。至私墾地畝之官兵民人等。本應計
餉。我追花利。惟念該處甫經成熟。尚未收穫。著加恩
止將地畝追出拋棄。其花利一概免追。以示體恤。

二十四年

諭前據斌良等奏籌議調劑雙城堡移駐京旗一摺。當
交該部會同各該旗妥議具奏。茲據將籌議章程分
析數議。該處太封堆外圍存荒地。該侍郎等請撥三
萬畝。令附近納丁陳民來春開種。惟念此項地畝。雇
民代墾。或私行租佃。將來必至悉為流民所據。移駐
旗人。轉至無地可耕。現在該處附近納丁陳民有無

外省流民。錯雜其間。應如何設法布置之處。亦未據
切實陳明。著趙爾巽悉心訪察。再行妥議。毋使膏腴
沃壤。任民佃種。有侵欺。尤不可敷衍一時。致京旗仍
虞貧窘。所有抽撥甲兵。添設義學。及一切未盡事宜。
著俟奏到時。另行覈議。欽此。遵。

旨議定章程。一。近屯荒地八千餘畝。准給三屯屯丁及
官兵子弟領種。每畝交京錢五百文。每年共收
京錢四千三百餘串。為賞給工本農具之用。一。
未種之地。令屯丁認佃代種。一。到屯京旗。無論
貧富。一律調劑。分三月十月分給。五年停止。一。

封堆外。除奉處陳民均有房屋外。其拉林阿勒楚喀陳民。有至彼墾地者。令自蓋窩棚棲止。一調劑京旗。唯於八里荒租錢撥給。無需另議籌款。一唯於阿勒楚喀等處伐木額兵內抽撥四十缺。歸雙城堡中屯挑選。以資調劑。一滿漢義學。照舊添設。○同治二年

諭。恩合奏稱錦州牧馬之區。名為西廠。水草豐茂。足敷牧放。此外則廣甯所屬之間陽驛。小黑山等界。名為東廠。地勢平坦。內有窪陷。於牧放不甚相宜。若將東廠裁撤。一律開墾。可得田一百萬畝。惟東邊一帶。近

有流民在彼私墾。聚集日衆。查辦甚難。請派封疆大員。詳酌籌辦等語。聞陽驛小黑山等界。舊設牧廠。既據恩合奏稱地勢低溼。於牧馬不甚相宜。而大凌河西岸地勢寬廣。即官馬多至一萬餘匹。亦足敷用。即着照該副都統所議。將東廠裁撤。歸併西廠牧放。遵照舊章妥為經理。其應墾廠地。即照恩合所擬。令盛京六十六佐領下甲兵。按名分領。招佃取租。除交升科租銀外。餘資津貼當差。其按年應徵租銀。即責成各該佐領催交造報。以收裕餉便民之效。○七年

諭。戶部奏吉林請開闢荒宜防流弊。並愿年報墾尚未

并科地畝。及欠交租項。請飭查追一摺。吉林圍場。原為長養牲畜。以備狩獵之用。設堆置卡。封禁甚嚴。乃該處游民。借開荒之名。偷越禁地。私獵藏牲。斬伐樹木。迨林木牲畜既盡。又復竄而之他。有招佃之虛名。無徵租之實效。數百年封禁之地。利遂至蕩然無存。即如景綸前於咸豐十一年奏稱。尚有圍場二十一處。而此次富明阿奏稱。該處南北十七八里。東西八十餘里。皆無樹藏牲。其為游佃偷越。已可概見。此次該將軍辦理開墾事宜。自當嚴防流弊。即著親往履勘。嚴定界限。毋任委員弊混。並將新墾各地。造具畝

數四至佃戶花名清冊。以及如何挪移卡倫。添設封堆。暨布置員弁。逐處巡查各事宜。詳細妥籌。迅行覆奏。以杜弊端。其前任將軍景綸奏請開墾夾信溝涼水泉荒地二十五萬餘晌。現有佃認領徵租者十三萬晌零。未報升科地尚有十二萬晌。續墾之土門子並省西圍場阿勒楚喀等處地畝共三十萬晌。應交押荒地捐兩項錢丈共一百二萬餘吊。除交過錢六十二萬餘吊。尚有未交錢四十萬吊。其交過押租地畝既有佃戶認領。何以僅將雙城堡佃戶認領地三萬三千一百六十晌。遲延不報。至此外未交押租地

十一萬餘晌。何以數年之久。並不招人承領。著富明阿確切查明。將土門子等處。已交押租之佃戶。造具清冊。迅速送部。並追出歷年地租錢文。以充兵餉。其餘土門子等處。未交押租。並夾信溝涼水泉。未報升科地畝。即著詳細履勘。予限一年。招佃認領。按晌升科。毋再延宕。儻查有已墾未報。及認多報少情弊。並著從嚴參辦。以昭覈實。○十一年

諭。都興阿等奏。旺清門外。渾江迤西地段。經都興阿等督飭協領崇善等。前往查勘。西自邊柵。東至渾江南。接前查地段。北至哈爾敏河口。二寶等處。共查出生

落六十九處。已墾熟地十萬三千一百餘畝。現已查
勘完竣。即著照鳳毅二邊門外奏定章程。於同治十
三年起科。以昭畫一。